

Tgi elegian ils parlamentaris grischuns?

Las decisiuns per in dals candidats per il cussegl federal èn per part fatgas

DAD ALINA MÜLLER / ANR

■ **Survegn Ignazio Cassis la maioritad da las vuschs dals cussegliers naziunals grischuns? I n'è anc betg dal tut cler co che nos tschintg parlamentaris vegnan a votar, ma i sa mussa fingia in trend. Els n'èn betg perina tge arguments ch'èn ils pli impurtants per sa decider per in dals trais candidats.** Ed era cun sa fixar sin in dals candidats pussaivels n'èn anc betg tuts tuttina lunsch: intgins han schon ideas fitg cleras tgi ch'els elegian la proxima mesemna, auters spetgan anc sin las rundas da dumondas en lur fracziuns cun tut ils candidats, ils uschenunads hearings. La Partida popular svizra (pps) ha decidì cleramain suenter ses hearing dal mardi passà cun ina maioritad da 45 vuschs per *Ignazio Cassis*. *Isabelle Morret* ha survegnì 11 vuschs e *Pierre Maudet* sulettamain ina. Ils verds e la Partida cristiandemocratica svizra (pcd) han era già lur hearings il mardi. Els n'han però anc betg fixà in favorit. Tut tschellas partidas vegnan a survegnir respostas sin lur dumondas als candidats il mardi proxim.

In dicat d'elecziun

Silva Semadeni (ps): «*Laura Sadis* da la Partida liberaldemocratica svizra (pld) tessinaisa fiss stada la candidata ideala.» Perquai saja ella fitg dischillusa che la pld haja be proponì Ignazio Cassis sco candidat dal Tessin, malgrà che Sadis fiss stada pronta da prender encunter la candidatura. Fin ussa haja dà set dunnas e set Tessinaiis en il cussegl federal. Ina persuna che adempliss tuts dus criteris avess ella giavischà. Tenor Semadeni èsi uss tuttina il mument per la Svizra taliana d'avair in cussegl federal. Cun



quai che mo in candidat stat a disposiziun na saja quai ussa betg pli ina vaira tscherna, mabain plitost in dictat. Il hearing da la ps ha lieu pir l'emna proxima. Fin quel termin vul Semadeni anc spetgar, per alura trair sia decisiun definitiva.

Nagin commemoradi en l'UE

Magdalena Martullo (pps): «Inse hai jau schon in'intenziun davart mia tscherna.» Però er ella vul sco emprim survegnir da mintga candidat respostas sin sias dumondas e pir sch'ella vesa, che sia impressiun vegn confermada, vul ella sa fixar sin ina candidata u in candidat. Per ella èsi impurtant ch'il nov cussegl federal surpiglia responsabladad, ch'el guardia

dal pajais e betg mo per sai, el duai esser in ch'è abel da cuntanscher insatge e da schliar problems complex. Plinavant èsa impurtant per ella che la Svizra na vegn betg commembra da l'UE ed il candidat na dastga betg esser per ina cunvegna da basa, che manass a derschaders esters ed ina recepziun da dretg. En ses eglis fissi però era bun sche la Svizra taliana fiss represchentada en la regenza, uschia che era ils interess grischuns chattian pli facilmain l'access al cussegl federal. La dumonda da derivanza saja però sper las ideas politicas dal candidat in criteri lateral. Per Martullo n'è il gender betg impurtant: «Jau hai constatà che dunnas en il cussegl federal na fan betg ina meglra lavur ch'il umens.»

Emprima prioritad: la constituziun

Martin Candinas (pcd): «Jau hai l'impressiun che tuts trais candidats èn eguals pertutgant lur cumpetenzas.» Tenor el è perquai insatge auter impurtant: numnadamain la Constituziun federala che di ch'ins duai prender resguard sin las minoritads linguisticas. Perquai èsi cler ch'el elegia il represchentant da la Svizra taliana Ignazio Cassis.

Duri Campell (pbd): «Jau sun da l'idea ch'ins sto resguardar la constituziun», argumentescha era Campell sia decisiun d'eleger in candidat da la Svizra taliana. Per el stat la qualidad dals candidats sur il argument d'eleger in candidat d'ina tscherta vegliadetgna u ina dunna. Quella qualidad vesa el en tut ils trais candidats

che la pld propona, uschia ch'el metta il focus sin la represchentaziun da las regiuns linguisticas en la regenza svizra.

Vegliadetgna n'è betg principala

Heinz Brand (pps): «Sco Grischun han ins ina tscherta affinitad per l'italianitad.» Era per el n'è la vegliadetgna betg l'argument central per u cunter in candidat. Ses focus metta el sin la tenuta dals candidats areguard Europa, independenza ed autodefiniziun da la Svizra.

Ils trais candidats

Ignazio Cassis: «Politica ha ina gronda muntada per mai.» Il Tessinais da 56 onns è maridà e n'ha nagins uffants. Dapi il 2007 è el en il cussegl naziunal. Il 2015 ha el surpiglià là il post sco president da la fracziun da la pld. Da professiun è el atgnamain medi ed el è stà perfin medi chantunal dal Tessin dal 1996 fin il 2008. Da diversas varts vegn el tractà sco favorit per la successiun da Didier Burkhalter.

Isabelle Morret: Ella è l'unica dunna che candidescha per il post sco cussegliera federala. Morret è oriundamain dal chantun Vad, tge che savess esser in dischavantag, perquai che *Guy Parmelin* da la pps, ch'è medemamain dal Vad, ha già in sez en la regenza svizra. Morret ha dus uffants da sis ed indesch onns. Da professiun è ella advocata.

Pierre Maudet: «Igl è in'aventura che cumenza cun blers inscutters, bleras surpraisas e blers obstachels.» Quai scriva el sin facebook cura ch'el ha dà enconuschent sia candidatura. Cun 39 onns è el il giuven dals candidats. Il giurist da Genevra n'ha anc nagin'experientscha sco parlamentari en la legislativa da la Svizra. Maudet è maridà ed ha trais uffants.

La anr ha vuli savair co ils parlamentaris grischuns elegian: da san. Martin Candinas (pcd), Silva Semadeni (ps), Magdalena Martullo (pps), Heinz Brand (pps) e Duri Campell (pbd).

MAD